

四庫全書

集部

欽定四庫全書

御訂全金詩增補中州集卷九

禮部閒閒趙秉文一

原六十三首

秉文字周臣滏陽人閒閒其自號也幼穎悟讀書若夙習大定二十五年進士應奉翰林文字上書論宰相胥持國當罷宗室守貞可大用又言獄訟征伐國之大政自古未有君以為可大臣以為不可而可行者坐譏訕免官未幾起為

同知岢嵐軍州事轉北京路轉運司度支判官  
承安五年冬十月陰晦連日宰相萬公入對上  
顧謂萬公曰卿昨言天日晦冥亦猶人君用人  
邪正不分者極有理趙秉文曩以言事降授聞  
其人有才藻工書翰又且敢言朕非棄不用以  
北邊軍興姑試之耳泰和二年改戶部主事翰  
林修撰出為寧邊州刺史二年改平定州治化  
清淨所去人思之貞祐初中國仍歲被兵公建

言時事可行者三一遷都二導河三封建朝廷  
畧施行之四年除翰林侍講學士明年轉侍讀  
興定中拜禮部尚書兼侍讀同修國史知集賢  
院開興正月京師戒嚴時公已老日以時事為  
憂雖食息頃不能忘每聞一事可便民一士可  
擢用大則拜章小則為當路者言殷勤鄭重不  
能自己竟用是得疾薨年七十四自幼至老未  
嘗一日廢書不觀著易叢說十卷中庸說一卷

揚子發微一卷太玄箋贊六卷文中子類說一  
卷南華略釋一卷列子補注一卷刪集論語孟  
子解各一十卷資暇錄一十五卷所著文章號  
湓水集者前後三十卷大槩公之文出於義理  
之學故長於辨折極所欲言而止不以繩墨自  
拘七言長詩筆勢縱放不拘一律律詩壯麗小  
詩精絕多以近體為之至五言大詩則沈鬱頓  
挫學阮嗣宗真淳簡澹學陶淵明以他人較之

或不近也字畫則有魏晉以來風調而草書尤  
警絕殆天機所到非學能至宣徽卿使河湟  
夏人多問公及王子端內翰起居狀朝廷因以  
公報聘其為四方所重如此論者謂公至誠樂  
易與人交不立崖岸主盟吾道將三十年未嘗  
以大名自居仕五朝官六卿自奉養如寒士不  
知富貴為何物蓋學道所得云

補歸潛志趙秉文字周臣磁州滏陽人少擢第

作詩及字畫有名王庭筠子端薦入翰林因言  
事忤旨外補後再入館為修撰待制轉禮部郎  
中出典奇嵐平定寧邊三郡南渡為直學士遷  
侍讀拜禮部尚書致仕再召為禮部改翰林學  
士天興改元夏四月卒年七十四公幼年詩與  
書皆法子端後更學太白東坡字兼古今諸家  
學及晚年書大進詩專法唐人魁然一時文士  
領袖壽考康寧爵位士大夫罕及焉性疎曠無

杓鑿治民鎮靜不生事在朝循循無異言家居  
未嘗有聲色之娛夫人卒不再娶斷暈肉麤衣  
糲食不恤也酷好學至老不衰後兩目頗昏猶  
孜孜執卷抄錄上至六經解外及浮屠莊老醫  
藥丹訣無不究心其所著有太玄解老子解南  
華指要湓水集

補歸潛志金取士以詞賦為重故士人往往不  
暇習為他文嘗聞先進故老見子弟輩讀蘇黃



詩輒怒斥故學者止工於律賦問之他文則懵然不知聞有登第後始讀書為文者諸名士是也南渡以來士人多為古學以著文作詩相高然舊日專為科舉之學者疾之為仇讐若分為兩途互相詆譏其作詩文者目舉子為科舉之學為科舉之學者指文士為任子弟笑其不工科舉殊不知國家勅設科舉用四篇文字本取全才蓋賦以擇制誥之才詩以取風騷之旨策

以究經濟之業論以考識鑒之方四者俱工其  
人才為何如也而學者不知徂於習俗止力為  
律賦至於詩策論俱不留心其弊基於為有司  
者止考賦而不究詩策論也我嘗記故老云泰  
和間有司考詩賦已定去取及讀策論則止用  
筆點廟諱御名但數字數與塗注之寡多有司  
如此欲舉子輩專精難矣南渡後趙揚諸公為  
有司文風始振然而謗議紛起矣

補歸潛志趙聞聞嘗言律詩最難工須要工巧  
周圓吾聞竹溪公論以為五十六字皆如聖  
賢中有一字不經爐錘便若一屠沽子廁其間  
也又云八句皆要警拔極難一篇中須要一聯  
四句為主後但以意收拾之足為好詩矣又嘗  
與余書曰選詩曰南登灞陵岸回首望長安朔  
風動秋草邊馬有歸心明月照高樓流光正徘徊此其含蓄意幾何又曰小詩貴風騷今人止

作硬語非也

補歸潛志閒閒平日字畫工夫最深詩其次又其次散文也嘗語余曰今日後進中作文者頗有三二人至今作詩者絕少字畫亦無也以是知公所長然議論經學許王從之散文許李之純雷希顏詩頗許麻知幾元裕之字畫頗許麻知幾馮叔獻也又嘗教余學書先法張旭石柱記每曰汝輩幸有天資正不許學古人一點一

畫寫也

補歸潛志閒閒論文曰文字無太硬之純文字最硬何傷王翰林從之則曰文字無軟硬惟其是耳余嘗以質諸先人以趙論為是

補歸潛志閒閒以文字名一世於吏事非所長興定初珠赫高琪為相惡士大夫有罪輒以軍儲論加箠杖在位者往往被其苦俄命趙公攝南京轉運司未幾果坐誤糧草事當杖既奏宣

宗曰學士豈當筭耶高琪曰不然無以戒後遂杖四十公大憤焉其後高琪誅詔適當公筆首曰君臣分嚴無將之罪莫大夫婦義重不睦之刑何逃曾是一身兼此二惡人謂趙公之仇雪矣

補歸潛志正大初閒閒長翰苑同陳正叔潘仲明雷希顏元裕之諸人作詩會嘗賦野菊趙有云岡斷秋光隔河明月影交荒叢號蟋蟀病葉

掛蠅蛸欲訪陶彭澤柴門何處敲諸公稱其破  
的也又分韻古瓶臘梅趙云土花暈碧龍紋澀  
燭淚痕疎鴈字橫後云嬌黃喚起昭陽夢漢苑  
淒涼艸棘生句甚工潘有云命薄從教官獨冷  
眼明猶喜跡雙清語亦老也後分憶橙射虎題  
甚多最後詠道學雷云青天白日理分明亦為  
題所窘也間間同館閣諸公九日登極目亭俱  
有詩題云魏國河山殘照在梁王樓殿野花開

鷗從白水明邊沒鴈向青天盡處迴未必龍山  
如此會座中三館盡英才雷希顔云千古雄豪  
幾人在百年懷抱此時開李欽止云連朝倥傯  
簿書堆辜負黃花酒一杯

補金史秉文上言宰相胥持國當罷宗室守貞  
可用章宗召問言頗差異於是命知大興府事  
內族膏等鞠之秉文初不肯言詰其僕歷數交  
游者秉文乃曰初欲上言嘗與修撰王庭筠御



史周昂省令史潘豹鄭贊道高坦等私議庭筠等皆下獄決罰有差有司論秉文上書狂妄法當追解上不欲以言罪人遂特免焉當時為之語曰古有朱雲今有秉文朱雲攀檻秉文攀人士大夫莫不耻之

附元好問間間公墓銘唐文三變至五季衰陋極矣由五季而為遼宋由遼宋而為國朝文之廢興可考也宋有古文有詞賦有明經柳穆歐

蘇諸人斬伐俗學力百而功倍起天聖迄元祐  
而後唐文振然似是而非空虛而無用者又見  
於宣政之季矣遼則以科舉為儒學之極致假  
貸剽竊牽合補綴視五季又下衰唐文奄奄如  
敗北之氣沒世不復亦無以議為也國初因遼  
宋之舊以詞賦經義取士預此選者選曹以為  
貴科榮路所在人爭走之傳注則金陵之餘波  
聲律則劉鄭之末光固已占高爵而釣厚祿至

於經為通儒文為名家良未暇也及翰林蔡公  
正甫出於太學大丞相之世業接見宇文濟陽  
吳深州之風流唐宋文派乃得正傳然後諸儒  
得而和之蓋自宋以後百年遼以來三百年若  
党承旨世傑王內翰子端周三司德卿楊禮部  
之美王延州從之李右司之純雷御史希顏不  
可不謂之豪傑之士若夫不溺於時俗不汨於  
利祿慨然以道德仁義性命禍福之學自任沉

潛乎六經從容乎百家幼而壯壯而老怡然渙  
然之死而後已者惟我閒閒公一人公諱秉文  
字周臣姓趙氏閒閒其自號也世為磁州滏陽  
人祖諱某用公貴贈正議大夫上輕車都尉天  
水郡伯考諱某贈中奉大夫上護軍天水郡侯  
李右司誌其墓述先世以來詳矣公幼穎悟讀  
書若夙習弱冠登大定二十五年進士第調安  
塞簿以課最遷邯鄲令再遷唐山丁郡侯憂用

薦者及提刑廉舉起復充南京路轉運司都勾  
判官丁太夫人某氏憂又用薦者起復應奉翰  
林文字同知制誥上書論事坐譏訕免官未幾  
起為同知岢嵐軍州事轉北京轉運司度支判  
官泰和二年改戶部主事遷翰林修撰考滿留  
再任衛紹王大安初北兵入邊召公與待制趙  
資道論邊備公言今大軍聚宣德宣德城小列  
營其外夏暑雨器械弛敗人且病迨秋敵至我

不利矣可遣臨潢一軍擣其虛則山西之圍可  
解兵法所謂出其不意攻其所必救者也王不  
能用其秋宣德以敗聞十月出為寧邊州刺史  
二年改平定州前政苛於用刑盜賊無大小皆  
梟殺之聞赦將至先梟賊死乃拜赦而盜愈繁  
公為政每從寬厚不旬月盜賊屏跡終任無犯  
者歲饑出俸粟為豪民倡以賑貧乏賴以全活  
者甚多及受代老幼攀挽戀戀不忍訣已出郭

復遮留之再三乃得去入為兵部郎中兼翰林  
修撰俄提點司天臺崇慶二年春太白經天公  
上奏歲八月當有人更王之變當國者以為妖  
言置章不通及期王出居衛邸如公言俄轉翰  
林直學士貞祐初公言時事三一遷都二導河  
三封建大略謂中國無古北之險則燕為近邊  
車駕幸山東為便山東天下富強處也且有海  
道可通遼東接上京宋有國時河水常由曹濮

開滑大名東平滄景會獨流入於海今改而南  
由徐邳水行處下視堤北二三丈有建瓴之便  
可使行視故堤稍修築之河復故道則山東河  
南合敵兵雖入可阻以為固矣三代封建外裔  
不能得中國之利秦罷諸侯而郡縣之無敵禍  
而有不及相救之禍其弊如銷鋒鏑令民間不  
得藏弓矢是也墮名城令腹內州軍不置樓櫓  
是也在承平日若無患及其弊則天下有土崩



之勢秦之勝廣漢之張魯唐之安史皆是也房  
瑄因祿山之亂請出諸王分置諸道祿山聞之  
曰天下不可得矣今就不能復三代之故亦宜  
分王子弟置諸道節度則是山東有大河之險  
有維城之固而無燕近塞之憂一舉而三者得  
矣明年上書請為朝廷守殘破一州上以公宿  
儒當在左右不宜補外不許四年除翰林侍講  
學士明年轉侍讀學士興定中拜禮部尚書兼

前職同修國史知集賢院事又明年知貢舉坐  
為所累奪一官致仕有旨以卿常告老今遂之  
也公家居上所以禮遇公者不少衰時遣中使  
問卿精神何如往年不數日復起為禮部尚書  
兼官如故入謝上曰卿春秋雖高以文章故須  
復用卿公亦以身受厚恩無以自効願為天子  
開忠言廣聖慮每進見從容為上言人主當儉  
勤慎兵刑所以祈天永命者上嘉納焉今天子

即位公再以年乞身改翰林學士修國史公以  
上嗣德在初當日親經史以自裨益進無逸直  
解貞觀政要申鑒各一通開興改元北兵由漢  
中道襲荆襄京師戒嚴上命公為赦文以布宣  
悔悟哀痛之意公指事陳義辭情俱盡城下之  
役國家所以感人心作士氣者公有力焉時公  
已老日以時事為憂雖食息頃不能忘每聞一  
事可便民一士可擢用大則奏章小則為當路

者言殷勤鄭重不能自己竟用是得疾以夏五  
月十有二日春秋七十有四終於私第之正寢  
時軍國多故賻祭不及大夫士相弔閭閻細民  
亦知有邦國殄瘁之歎越二日權殯開陽門外  
二百步有待也積官至資善大夫勲上護軍爵  
天水郡侯食邑一千戶實封一百戶先娶劉氏  
再娶郭氏並封天水郡侯夫人前公卒子男一  
人名似待闕御史臺掾女三人長劉出也嫁汝

州推官高可約次嫁衛州行部郎中石玠季嫁  
省知管差除令史張履三婿皆名進士也所著  
書傳於世

已詳中州  
集原傳

公之塋也孤子似以好問

公門下士來速銘因考公平生而竊有所嘆焉  
道之傳可一人而足所以弘之則非一人之功  
也唐昌黎公宋歐陽公身為大儒繫道之廢興  
亦有皇甫張曾蘇諸人輔翼之而後挾小辯者  
無異談公至誠樂易與人交不立崖岸主盟吾

道將四十年未嘗以大名自居仕五朝官六卿  
自奉如寒士而不知富貴為何物生河朔鞍馬  
間不本於教育不階於講習紹聖學之絕業行  
世俗所背馳之域乃無一人推尊之此文章字  
畫在公為餘事自以徒費日力者人知貴之而  
不知貴其道歟桓譚有言凡人賤近貴遠親見  
揚子雲故輕其書若使更閱賢善為所稱道其  
傳世無疑譚之言今信矣然則若公者其亦有

所待乎銘曰道統中絕力任權御一判藩籬倒  
置冠屨公起河朔天以經付挺身頽波為世砥  
柱優柔而求饜飫而趣春風舞雩如望趨步心  
與理叶默以言寓發道大全初莫我助大夜而  
旦大夢而寤乾端坤倪軒豁呈露致知力行開  
物成務在德為柄在治為具吾道非耶而以文  
遇足已無待恃義不懼憂國愛君華首彌固藏  
書名山京師其副後禮樂興當表公墓

雜擬三首

朱明變氣候大火向西流六龍整征轡倏忽夏已秋閭  
闔來悲風霜稜被九州豈不念時節歲律聿其周精衛  
填溟海木石安所投獨攜羨門子高步登崑丘千秋長  
不老永謝區中囚

猗猗南山竹並生凡卉叢歲晏多霜雪見別蕭艾中我  
欲食鷄雛千歲不一逢留之和律呂截作嶰谷筒一變  
為清商日莫來悲風清泉溉石根上有白雲封虛心抱



靜節知音為誰容不如歸去來一竿釣清澧

白日淪西汜滄海無回波四時更代謝奈此遲暮何我  
欲制頽光惜無魯陽戈憑高望八荒惆恍迷山河驚風  
振江海山林無靜柯獸狂走四顧曠野迷絳羅西登廣  
武山北顧望三河蓬蒿蔽極目人少虎狼多喟然發長  
歎撫劍徒悲歌

花下墓

山前樹今人看花昔人墓昔人栽花待邀賓花開墓上

人何處今年花盡復明年今人復為後人憐酒澆墓上  
喫不得留與飢鴉作寒食

傲王右丞獨坐幽篁裏

獨坐幽林下談玄復觀易西日隱半峰返照林間石  
上多古苔山花間紅碧花落人不知山空水流出

和陶淵明擬古五首

小智多自私大方乃無隅一毫納萬象萬象非卷舒日  
月為我牖天地為我廬曲士窘拘囚一身無容居我夢

登日觀青天入平蕪俯視但一氣二豪彼何如

昔日穆天子侈心窮八荒崑崙入馬蹄蘧廬視明堂王  
母為之謠白雲何茫茫憑高俯九州塊如螻蟻場歸來  
越河關萬冢壓崧邛遂令學仙者聞風為激昂漢武千  
秋露淮南八公方至今瑤池宴空為後代傷

吾道無緇磷萬古常如茲奈何中智下謂彼不知時與  
世頗殊好譬彼澠與淄我欲質所從登高望九疑路逢  
古漁父長歌滄海辭出門異所見退坐還自思當世固

殊古古人不我欺翩翩出林鳥日暮將何之倚簷送歸  
盡聊欲弦吾詩

西北有佳人樓上撫雲和一鼓別鶴操再弄求凰歌絃  
聲幾欲絕哀響何其多昔為掌中珍今為路傍花壯年  
不再得華落將如何

張衡詠思玄屈平賦遠遊高情薄雲天意氣隘九州朝  
攀扶桑枝夕飲弱水流翻然不忍去無女哀高丘嚴霜  
下百草歲律聿其周蕭蘭共憔悴已矣吾何求

中秋

天風吹河漢明月懸清光清光不可掇流影入杯觴吸  
此風露魄洗我冰炭腸向來功名心一笑雪沃湯人生  
幾中秋彈指三萬場胡為置熱惱不使心清涼此心如  
秋月虛明洞八方此身萬化中太山一毫芒尚無物與  
我何者為彭殤推琴黃葉落矯首白雲翔解衣一盤礴  
清境墮渺茫

送雷希顏赴涇州錄事李君美治中公廨南樓坐

中作

嚴霜枯百草搖蕩鴻鵠心翩翩萬里翼隨雲落西南涇  
州東流不到燕送君落日孤雲邊聲名一日天下白還  
作高樓坐中客西州自古多豪英作者凜凜氣猶生太  
尉清風邁萬古不勞折筭笞貔虎男兒生不功名死無  
益莫言簿領卑凡職君不見當時髯張一尉耳至今雙  
廟令人起

魯直烏絲欄黃庭

太清虛皇玉景經琅函瓊笈祕始清囊以雲錦金鈿局  
四神守衛訶百靈中夜一氣存黃庭玄霜瓊膏灌子形  
方瞳綠髮魂魄寧上壽千秋下百齡天書夜降敕六丁  
控駕三素乘風冷鳳笙龍管超冥冥揚旌抗旆耀飛星  
八威吐毒驅雷霆擲火萬里流金鈴仙人拂石喏不聽  
笑視人世風中螢世間醉夢紛臙脰三尸調汝丹田螟  
有如尾閭泄滄溟一朝神離鳥飛鉗涪翁書法出蘭亭  
名書此經實自銘開卷恍然如酒醒養生新發庖丁研

同粹中師賦梅

寒梅雪中春高節自一奇人間無此花風月恐未宜不  
為愛冷艷不為惜幽姿愛此骨中香花餘嗅空枝影斜  
清淺處香度黃昏時可使飢無食不可無吾詩

游華山寄元裕之

我從秦川來遍歷終南游暮行華陰道清使明雙眸東  
風一夜橫作惡塵埃咫尺迷巖幽山神戲人亦薄相一  
杯未盡陰靈收但見兩崖巨壁插劍戟流泉夾道鳴琳



璆希夷石室綠蘿合金仙鶴駕空悠悠石門劃斷一峰  
出婆娑石上為遲留上方可望不可到崖傾路絕令人  
愁十盤九折羊角上青柯平上得少休三峰壁立五千  
仞其下無址傍無儔巨靈仙掌在霄漢銀河飛下青雲  
頭或云奇勝在高頂脚力未易供冥搜蒼龍嶺瘦苔蘚  
滑嵌空石磴誰雕鏤每憐風自四山而下不見底惟聞  
松聲萬壑寒颼颼捫參歷井到絕頂下視塵世區中囚  
酒酣蒼茫瞰無際塊視五嶽芥九州南望漢中山碧玉

簪亂抽沉復秦宮與漢闕飄然聚散風中漚上有明星  
玉女之洞天二十八宿環且周又有千歲之玉蓮花開  
十丈藕如舟五鬣不朽之長松流膏入地盤蛟虬采根  
食實可羽化方瞳綠髮三千秋時聞笙簫明月夜芝輶  
羽蓋來瀛洲乾坤不老青山色日月萬古無停輶君且  
為我挽回六龍轡我亦為君倒却黃河流終朝汗漫遊  
八極乘風更覓元丹丘

和淵明飲酒九首

翩翩萬里鶴日莫將何之昏鴉擇所安笑汝不知時孔  
席不暇暖此理吾不疑尚愧淵明翁濁酒時一持

貧賤豈不苦仰慕冥鴻飛富貴豈不樂乃有黃犬悲苦  
樂各異趣嗜好從所依我欲作九原獨與淵明歸挂冠  
不待年況此齒髮衰遙酌一杯酒毋令寸心違

秋菊有至性霜松無俗姿采采黃金花笑撫蒼煙枝偶  
有杯中物成此一段奇白雲南山來出岫復何為醉臥  
東籬下聊脫人間羈

今日好天色清晨雪雲開東風如故人適我平生懷坐  
見南來燕孤雌與雄來暮歸主人堂梁間有雙栖巢傾  
覆其子又補新巢泥翩翩隨陽鴈幽貞苦難諧江湖偶  
相失咫尺雲路迷哀哀霜雪際獨向北天回

驚鳥閉籠中舉翮觸四隅騏驎駕鹽車跼蹐困中途雖  
然遭識拔未免為人驅傍觀信美矣自愧良有餘不如  
兩無累還我田園居

千載淵明翁誰謂不知道漫賦責子詩調戲以娛老杜

陵蓋自況亦豈恨枯槁壺觴清濁共適意無醜好歸來  
五柳宅守我不貪寶長嘯天地間獨立萬物表

幽居淡無事雅志了玄經眼花憎文字悠悠竟無成中  
夜起不寐披衣守寒更梅竹散清影素月流廣庭孤鶴  
悶逸響切切寒蟲鳴撫卷長歎息慷慨惻中情

漢儒傳注學未為世所得秦火少完書豈免焉惑後  
儒補罅漏聖道少開塞俗士喜持戈又一秦相國且共  
歡一觴多言不如默

淵明非嗜酒愛此酒中真謂言忘憂物中有太古淳回  
首市朝中萬事牛毛新去年持使節悠悠過西秦宮閣  
隨飛煙衣冠化埃塵當年憑軾士慷慨歎徒勤所以山  
林客樂與魚鳥親西登太華頂曠望長河津寄謝三山  
雲聊欲濫吾巾誓將從此去笑謝當塗人

和韋蘇州秋齋獨宿

冷暈侵殘燭雨聲在深竹驚鳥時一鳴寒枝不成宿

擬兵衛森畫戟

冠帶事朝謁清坐彈鳴琴以彼塵外趣遠我遺世心岸  
幘送歸鳥隱几見遙岑  
同靜者樂豈必居山林

寄王學士子端

寄語雪溪王處士年來多病復何如浮雲世態紛紛變  
秋草人情日日疎李白一杯人影月鄭虔三絕畫詩書  
情知不得文章力乞與黃華作隱居

上清宮二首

霜葉蕭蕭覆井欄朝元閣上玉簪寒千年遼鶴歸華表

萬里宮車泣露盤  
日上霧縈迷碧瓦  
夜深月露洗荒壇  
斷碑膾炙人何在  
吏部而今不姓韓

暇日登臨近吹臺  
夷門城下訪寒梅  
黿頭他日幾人在  
尊酒而今一笑開  
秋潦滲餘村徑出  
夕舂歇處野禽來  
醉歸扶路人爭看  
知是詩仙閭苑回

寄陳正叔

渺渺西風去翼輕  
長林楓葉動秋聲  
嵩邛競秀容多病  
河洛交流忌獨清  
廣武山川迷故壘  
成臯草木閤空城



憑高一掬英雄淚寄與窮途阮步兵

寄裕之

久雨新晴散痺頑一軒涼思坐中間  
樹頭風瀉無窮水天末雲移不定山  
宦味漸思生處樂人生難得老來閒  
紫芝眉宇何時見誰與嵩山共往還

古餅臘梅

石冷銅腥苦未清瓦壺溫水照輕明  
土花暈碧龍紋澀燭淚痕疎鴈字橫  
未許功名歸鼎鼐且收風月入瓶罍

嬌黃喚醒昭陽夢  
漢苑荒涼草棘生

暮春得寒字

九日聊偷一日閒  
三分春事二分闌  
鄉關夢裏人空老  
風雨夜來花又殘  
乍拆泥封羔酒熟  
未開火禁粥飭寒  
却思投劾歸田去  
楊柳陰中把釣竿

靈感寺

徒河岸北白蓮東  
法鼓驚飛碣石鴻  
塢上風煙高鳥路  
山頭雲雨化人宮  
松林礙日蜂房冷  
石砌頽沙蟻穴空

欲盡休公揮塵樂鬢絲羞對落花風

五月牡丹應制

好事天工養露芽陽和趣及六龍車  
天香護日迎朱輦國色留春待翠華  
穀雨曾霑青帝澤薰風又卷赤城霞  
金盤薦瑞休嗟晚猶是人間第一花

代州

金波曾醉鴈門州端有人間六月秋  
萬古河山雄朔部四時風月入南樓  
漢家戰伐雲千里唐季英雄土一丘

繫馬朱闌重回首烟波誰在釣魚舟

開元寺

歲久開元寺黃花落石龍繡苔添碧甃蝸壁篆金容窓  
影年年塔禽棲夜夜鐘平生睡秋雨竹閣味偏濃

謁北嶽

四大神儀一羣山太極尊奠方荒冀宅視禮配天孫西  
送虞淵暮東瞻碣石瞰寶符臨代郡鉞甕扼并門控趙  
襟形壯色燕氣象渾九河探禹跡萬里叫虞魂在昔登

封始前驅羽衛繁千家駢部曲萬騎隘山樊卜地恒陽  
曲移祠泰始元

晉移祠  
曲陽

荒碑刊歲月飛石碣乾坤秩

加黃屋宮居象紫垣雲楣朽芝瑞雨砌裂槐根天業恢  
弘大山靈翊衛屯巫閭歸帝製長白發金源九廟龍盤  
接三邦地勢吞雲烟浮近甸日月遶中原歎謁天香重  
封題御署存銀鏐諸產富雷雨萬靈奔神聽羞回德天  
聰納正言負時身九死去國淚雙痕日近趨天闕生還  
託聖恩許身徒稷契無術補義軒帝錄長桑洞仙巖張

果村卜居如可近重整北山轅

陪李舜咨登憫忠寺閣

日月躔雙拱風烟納寸眸雲山浮近甸宇宙有高樓  
鳥外餘殘照天邊更去舟登臨有如此況接李膺遊

廬州城下

月暈曉圍城風高夜斫營角聲寒水動弓勢斷鴻驚  
利鏃穿吳甲長戈斷楚纓回看經戰處慘淡暮寒生

白鴈

波淨影逾白，霜清鳴更哀。  
乾坤雙鬢老，風雪一聲來。  
林迴隱猶見，天長去復回。  
物情嫌太潔，莫使羽毛催。

桃花島寄王伯直

冰破村橋擁春寒，旅鴈低遠山。  
封霧小，高浪與雲齊。  
島寺明松雪，湖船濺藕泥。  
詩情吟不盡，寄與畫中題。

郎山馬耳峯

房駟落人間，入石露雙碧。  
月明聞夜嘶，驚落山頭石。

春遊三首

無數飛花送小舟  
蜻蜓欵立釣絲頭  
一溪春水關何事  
皺作風前萬疊秋

樹藏修竹竹藏門  
門外清流幾股分行過  
小橋人不見  
背陰花氣隔牆聞

烟外絲絲風柳斜  
春光已自到天涯  
太平有象邛邛酒  
寒食無家處處花

暮歸

貪看孤鳥入重雲  
不覺青林雨氣昏  
行過斷橋沙路黑



忽從電影得前村

清居寺五杉亭觀子野留題

五杉今日只三株曾是詩人歎息餘  
君去我來杉尚在斷腸君歿見君書

雞鳴山

烟蒸山腹晴猶溼河帶冰漸暖漸流獨上雞鳴看日出  
五雲多處是皇州

盧溝

河分橋柱如瓜蔓路入都門似犬牙  
落日盧溝溝上柳  
送人幾度出京華

雨晴二首

東風時送瓦溝聲  
歌枕幽窓夢自驚  
睡起不知雲已散  
夕陽偏向柳梢明

一抹平林媚夕暉  
山烟漠漠燕飛飛  
倚闌遙認天邊電  
何處行人帶雨歸

寓望

蒲根閣閣亂蛙鳴點水楊花半白青  
隔岸風來聞鼓吹  
柳陰深處有園亭

戴花

病來杯酒懶重持強為花殘折一枝  
人老易悲花易落  
東風休近鬢邊吹

玉堂

玉堂陰合冷窓紗雨過銀泥引篆螭  
萱草莪葵俱不見  
蜂聲滿院採槐花

夏至

玉堂睡起苦思茶  
別院銅輪碾露芽  
紅日轉堦簾影薄  
一雙蝴蝶上葵花

華山

石頭聲磳水縱橫  
過雨山間草屨輕  
未到上方先滿意  
倚天青壁看雲生

雨晴

一春不雨漫塵黃  
碧瓦朝來汎霽光  
留得紫薇花上露

幾招渴燕下雕梁

即事

樓頭不見暮山重  
遙認青林雨意濃  
一陣風來忽吹散  
斷雲還補兩三峯

同樂園二首

春歸空苑不成妍  
柳影毵毵水底天  
過却清明遊客少  
晚風吹動釣魚船

石作垣牆竹映門  
水回山複幾桃源  
毛飄水面知鷺柵

角出牆頭認鹿園

繫舟山圖

裕之先大夫嘗  
居此山之東巖

山頭佛屋五三間山勢相連石嶺關名字不經從我改  
便稱元子讀書山

虎牢

兩崖峽束枕洪濤自古英雄爭虎牢蒼天胡為設此險  
長使戰骨如山高

御訂全金詩增補中州集卷九

欽定四庫全書

御訂全金詩增補中州集卷十

趙秉文二

共五百三十五首  
從滄水集補入

雜擬

朔風厲嚴氣玄雲結層陰霜雪被原野行李寒駸駸  
躅獸強顧驚鳥辭故林路滑跼峻坂緣雲上巖壑挽藤  
斷人跡反畏蹙然音藜藿不充腸况乃饑饉侵開門望  
晴霽白日肯照臨不憂凍餒逼所懷四海心聊興漆室



歎不待雍門琴

猗猗竹與桐並生江之潯朝日照孫枝夕風振瑤林鳳  
凰天外來飛下玉山岑棲枝食其實氣類無幽深變倫  
不世出斤斧倘見尋一截嶰谷管一製薰風琴偶蒙識  
者賞無窮出清音

空齋日無事起坐橫鳴琴明月入我牖照見萬古心古  
風不復還中有太古音置琴挂壁上吾道無古今

戚戚去故里辛苦從軍行黃沙翳白骨麟閣誰功名西

北秋風至日暮愁雲生火燒白草岡水斷黃河聲天寒  
馬屯縮仰天為悲鳴男兒貴死難義重鴻毛輕南登彫  
陰坂北望驃騎營注馬千丈坡射鵬萬里程

西北有高城來往交河道古來征戰地白骨埋秋草人  
壽非金石生男不待老不敢上譙樓唯恐愁絕倒

秦時築上郡漢家事西鄙邊兵塵雨雪血漲黃河水千  
秋百歲後魂魄來遊此一誦古戰場悲風來萬里

豪斟巨炙排九楹玉盤醪醑一再行秦王高歌趙王悲

屬車天遠邯鄲城侍臣冲冠髮直指秦庭虎賁劍鋒倚  
咸陽山色如死灰邯鄲霸氣清於水引車還避將軍路  
叢爾那能持兩虎君不見世間男兒健如虎一旦焉知  
不如鼠

秋日郊行

瘦馬兀西風節物遽如許雀噪晚禾場蝶飛秋菜圃桑  
枯竅呼風槐老皮溜雨聞聲不見人隔林過社鼓

初望少室

好山如佳士洗盡名利塵對之斂衽敬可愛不可親一  
水刻我骨一石融我神何況三十六峰峰與天隣仰看  
青礐礐俯矚白磷磷因之携畫本試寫蒼然真三日宿  
其下舐筆不敢皴歸來閉閣臥枕上山橫陳題詩追所  
見何必如古人

盧巖

龍潭繞石壁鳥道盤青蒼飛泉從中來聲落讀書堂左  
右灑石壁石上含宮商尚疑盧徵君醉騎白鸞翔至今

明月夜飛下青山長去之五百載丘壑道愈光舉瓢取  
此水清風益難忘

龍門

洛陽三日雨不見龍門面流水入野田歸雲抱幽巖因  
尋商山眠遂就石樓飯山川宛如昔白傅不可見

過陸渾

言從陸渾去不遇紫芝還鳥飛不盡處夕陽千萬山雲  
起動兼靜水流忙更閒坐待石上月滅沒烟嵐間

此詩  
澄水

集古律  
詩并收

至日感事

人言至日一線長我覺至日一線短縫新綻舊不如昔  
身上衣猶慈母線昨日日短猶可長今日衣敝不可綻  
年年至日壽北堂親不在堂衣在眼

遊玉泉山

夙戒遊名山出郊氣已豪薄雲不解事似妬秋山高西  
風為不平約畧出林梢林盡湖更寬一鏡涵秋毫披雲

冠山頂屹如戴山鼇連旬一休沐未覺陟降勞高談到  
晉魏健筆凌風騷玉泉如玉人用舍隨所遭何以侑嘉  
德酌我玉色醪

陪趙文孺路宣叔分韻賦雪

堂堂翰林公清癯如令威雪花對尊酒浩氣先春歸一  
還天地素平盡山川巖松竹瀉清聲窓戶明幽輝呼童  
設茶具巡簷收落霏清寒入詩腸思遠昏鴉飛力除鹽  
絮俗改事文章機後生那辨此顰眉正宜揮請看西溪

老傳作東坡衣

奇嵐賦雪分韻得素字

閉門三日雪荒城甚無趣  
土屋多半頽雞犬迷牖戶  
雲端高青熒天色易晚暮  
寒迷日車轍清絕坤維柱  
泉藏凍虺蟄松摧老蛟怒  
餓鶻嚇癡雛饑鴈跡寒兔  
野人市樵蘇不辨入市路  
蹇驢踖峻坂愁見冰河渡  
陽衰理必復天地豈終汙  
佇看黃雲晴飛屑落高樹

望北山雲



浮雲起太行六合須臾間清風相汲引吹我渡榆關歲  
旱不成雨悠然歸故山向來無心出亦復無心還

井陘韓信廟

朝涉滹沱流驅馬望太行莫投井陘宿僕痛馬玄黃地  
瘠斬春色山高易夕陽暮天飛鳥盡佇立向蒼茫

漸臺行

齊國有四殆漸臺空五層臺城膏血盡鬼力猶不勝浮  
雲一蔽臨淄君君王左右多青蠅嫠婦不卹緯祀國憂

天崩任從笑掩侍人口仰天大撫列女膺一言反掌易  
春風愛溜澠吳楚各千里飛鳥不敢凌越以西子亡齊  
以無鹽興醜興而美亡未易定愛憎請君實此圖觀國  
如延陵

秋懷次高叅軍韻

秋風蕭條秋氣傷歲云暮矣思故鄉客行來歸正落木  
雁飛不下空斜陽白草岡頭風似箭黃沙戍下月如霜  
聞君近有從軍作愁思與之誰短長

三五七格

秋風清秋月明白露夜深重白雲秋曉輕夢回酒渴呼  
童起枕上轆轤三五聲

倣嚴武臨邊

少年騎馬耳生風老去羞無汗馬功落日秋風心尚壯  
令人回首望雲中

遊箭山

天風吹雪下平田紛紛逐馬銀杯翻何處清風搖玉鐸

興來不覺過青山山山可望不可攀長河鏡裏開烟鬟  
浮雲不見山頂相想是落日孤雲間箭山峰頭望碣石  
東南海水不可極六龍賓日半海紅長鯨駕浪掀天白  
萬峰回合處九折十三盤一溪初入山百轉萬壑度盡  
松聲寒老苔萬古帶石色枯松倒植蒼苔裂石門劃斷  
一峰開猶向雲端眺青壁不見長安許道寧披麻誰繪  
倚天青天上謫仙金鑾客削爪詠此晴嵐碧眼前安得  
此突兀想像造化初開闢詩人以來幾人到只說終南

與嵩少他年騎鶴歸蓬萊仰天却笑箭山小

做太白登覽

扁舟過海嶼風便一日耳咫尺不可期波濤四千里竭  
來雞山下共浴桃花湯洗盡塵土骨心期雲水鄉夜夢  
掛席南斗傍金山寺影水中央海雲噓蜃化樓閣撞鐘  
擊鼓聞海陽施食狎鷗沾法味啣花馴鹿散天香夕陽  
萬頃鷗沒處水銜天影青茫茫臨風朗詠太白句鳥飛  
不盡吳天長海山道人種白玉碧眼方瞳照巖谷遺我

天書三十六模糊塵眼不可讀醉乘天上紫玉麟銀河  
倒浸扶桑新麻姑兩鬢垂秋霜人間陸海變耕桑歸來  
笑撫靈松下春風幾度桃花香

閭山懸巖寺觀宇文公吳東山題名

幽州之鎮醫巫閭襟帶遼碣吞玄菟誰開青壁一萬丈  
坐我陸海之方壺有泉聲而飛有松實而腴雲烟出沒  
隨朝鋪三百六十古精廬望海寺前列幢蓋鎮山亭下  
羅笙芋廣寧太守來肩輿今日之遊差樂乎問而不答

心語口高士例與山相娛壁間題詩亦髣髴記是詩人  
高蔡吳山僧睨壁笑問吾他山還有此客無黃華老人  
醉騎驢向天亦貌懸巖圖

海月

東方雲海何所無千奇萬怪雄牙鬚風腥雨鹵懶下筍  
盡與海月為僕奴滄波萬古照明月化為團圓此尤物  
混然別有一太虛七竅不施斤斧力不辭支解充君須  
照君胸中五車書清光半食入肝肺雄文徑欲誅蟾蜍

一經上下波心白幾誤謫仙淪醉魄為君掛席拾滄溟  
海嶽樓頭斫冰雪

松糕

嗟嗟千歲姿不比明堂蒿膚裁三韓扇液製中山醪皮  
毛剝落盡流轉到松糕髯龍脫赤鱗三日浴波濤玉甌  
持玉杵搗此玄霜膏文章百雜碎肪澤滋煎熬殷勤小  
方餅裁以鞍畔刀味甘剖萍實色殷煎櫻桃遼陽富冬  
菹盤饌窮溪毛巧謀一飽地蘼粉不我逃腹中十八公



笑汝真老饕未忘口腹累尚似賢蒸羔真休若硬老家  
風太孤高聊將酥蜜供調戲引兒曹多生根塵習焉求  
勝珍庖一舌有多智無乃綿蕞勞人間無正味嗜好隨  
所遭安能知許事為君續離騷

霜葉

天工設色繪雲屏山光擘破烟嵐青夕陽閃閃見鴉起  
晚風蕭蕭吹客醒林間老僧倚瘦藤一枝秋水冷金瓶  
日暮千巖秋影裏紛紛吹落讀殘經

遊紫霞山

共聯塵外鑣薄遊西山寺夕照返河山秋容滿天地霜  
風失故綠顏色少娉媚黃花似吾衰紅葉如人醉病來  
不舉酒得意同此味纍然似空尊酒盡同棄置

題大令冠軍帖

君不見長安城中永寧里玉軸牙籤散城市流傳人間  
知幾姓墨蠹老蛟蟠不死怪君何處得此本上有大令  
冠軍字嗚呼真贋久不辨咄咄逼人皆李衛至今淳化

二王帖多是唐人所臨硬黃紙想當盤礴下筆時睥睨  
九原呼欲起以燈取影見面觀心知不言識形似長沙  
無人賢郡亡後來作者不到此何必更問當年誰吾言

久已經平子

黃山云懷  
素所臨

人日遊西山寺觀謝章壁畫山水

蕭寺荒堂三五間謝章滿壁畫江山天涯霜雪少春意  
一日携酒開心顏饑禽穿窓啄官粟歲久剝牆樵指禿  
山僧送客不關門寒雲夜夜飛來宿

擬李長吉擊毬行

錦韉珠絡四百蹄，繡胸嵌花雙狻猊。  
分曹入場鼓聲作，月趁流星馬前落。  
側身下臂疾鳥回，霹靂一聲龍門開。  
玉鞭笑擊金鐙響，綠韉齊出黃金枝。  
臨堦下馬坐廣亭，玉盤行酒跪輸朋。  
蒼頭上馬抱黃帕，一點飛塵夕陽下。

歲暮言懷

歲晏多北風，塞向臥南壁。  
龜紋羃紙帳，規以安我室。  
宇宙豈不寬，盤薄入容膝。  
窓明讀易朝，月冷談道夕。  
風簾

偶成韻一笑付終日嚴城傳夜柝曾是非戎役驚颺動  
河漢原野曠蕭瑟積陰蕩寒氣歷歷星斗白龍鍾感歲  
換留滯眇天北懷昔獨悲辛乾坤同寥閬

冬至

小時逢冬至夜半叩鄰里及今老無事却呼童稚起坐  
深朋友敬甚矣吾衰矣笄女將及人吾衰固其理行年  
四十二始有此兒子未知賢與愚懷抱差可喜嚴冬霽  
霜雪風日稍清美一醉忘其家頽然枕琴几

重九登會禪寺冷翠軒

北風吹倒磨雲峰凜然雙角蟠白龍邊城雪花大如席  
黃花紅葉誰為客會禪西軒作重九登高望遠開心胸  
烟嵐卷盡莫山碧冷雲萬里迷玄鴻山北花豬大如馬  
割鮮飲食如長虹酒酣起舞望兩寺烏驚踏雪摧長松  
天低日落望不盡一徑何處來樵蹤君不見七金山下  
打圍處貂裘風帽寒蒙茸跑風駿馬下平野迎霜老兔  
咻榛叢歸來得雋詫朋友臨風一飲輕千鍾歡餘勝地

兩蕭瑟百年聚散如飛蓬明朝却望登眺處城中唯見  
白雲封

題東坡眉子石硯詩真蹟

東坡袖裏平原手忠義胸藏筆發之世俗臥筆取妍媚  
書意乃似東鄰施何曾夢見麒麟兒天骨不似駑駘肥  
傾囊倒軸精妙乃如此世間惟有眉子石硯吾家詩

風琴堂

我家琴寫風入松君家風琴惟隱几月明天籟自宮商

何處安排君十指風動龍吟自不知無絃底處覓成虧  
世間真樂類如此但恐此聲非此耳

聽雪軒

冰花吐琅玕窓外留半月蕭然煮茶興似倩此君說玉  
龍臥無力時送窓紙濕夜久沈無聲風枝墮殘屑

遊崆峒山

圓方相涵浩無窮巨細長短相形中至人遺形立於獨  
直與天地相始終不離汾水見姑射心知何處非崆峒



惜哉小智聞道晚強以耳目尋遺蹤去城三十里而遠  
其下問道軒轅宮綠雲一逕羊角上忽得平壤羅諸峰  
悄然坐我白茅室目所未擊神已通青山為身澗水舌  
賓主相對森談鋒是中無問亦無答一墮觀聽真盲聾  
何人意得乃忘象豈必日月推屯蒙叅雲亭西山更好  
下視落日低金容歸來秀色艷眉頰夢駕萬里西飛鴻  
題楊秘監畫馬

楊侯詩人寓於畫後身韓幹前身馬驂駟萬匹落人間

一紙千金不當價曾貌先帝麝香驄紙上飛出天池龍  
至今畫史比良樂一洗萬古凡馬空時手畫皮歎奇蹟  
三百年來無此筆艱難常恨少神駒掩圖獨抱龍媒泣

靈巖寺

泰山天下山方山屹相對何時巨鼇趾中斷神斧快遂  
令齊與魯劃若中作界陽坡青礫礫陰崖白碓碓衆峰  
如環城盤盤一都會一逕入靈巖十里行筇籟飛泉何  
處來石梁納高派金碧閤精藍未到氣先邁鐘魚集萬

指陳迹向千載何人僧伽黎入壁了無礙夫君豈知道  
證此身不壞異類服猛逸草木動光怪信知像教力超  
越範圍外年來筆墨廢政坐耳目隘不行萬里脚恐負  
三生債濟南山水窟巖寺風煙最乞我一把茅飛身入圖  
畫

江岸藏舟圖

遠村樹如薺近岸舟如月孤舟泊沙尾危檣見木末前  
山景氣佳日落涼風發時有渡頭人蕭蕭吹素髮

香山飛泉亭

霜風吹林林葉乾  
泉聲落日毛骨寒  
道人清曉倚欄干  
自汲清泉掃紅葉  
一卷冬住白雲端

東坡赤壁圖

連山盤武昌古木叅雲稠  
誅茅東坡下門前江水流  
永懷百世士老氣益九州  
平生忠義心雲濤一扁舟  
笛聲何處來喚月下船頭  
掬此月中水簸弄人間秋  
蕩搖波中山光中失林丘  
古今一俯仰共盡隨虬蟉  
孫曹何足

弔我自造物遊尚憐風月好解與耳目謀歸來玉堂夢  
清影寒悠悠一顧能幾何鵲巢淹不留遺像不忍掛尚  
恐兒輩羞儼然袖雙手妙賦疑可求何時謫仙人騎鶴  
下瀛洲相期遊八表一洗區中愁

伯時畫九歌

楚鄉桂子落紛紛江頭日暮天無雲烟濃草遠望不盡  
翩翩吹下雲中君九歌九曲送迎神還將歌曲事靈均  
一聲吹入汨羅去千古秋風愁殺人

倣張志和西塞

一葉黃飛一葉舟  
半竿落日半江秋  
青草渡白蘋洲  
歸路月明山上頭

白頭波上白頭人  
黃葉波西黃葉村  
山幾朶酒盈樽  
落日西風送到門

楊秘監秋江捕魚圖

山蒼蒼江茫茫  
鳥飛不盡吳天長  
潮平漲落洲渚出  
秋風幾舍鱸魚鄉  
漁郎聚魚鳴兩漿  
輕罾觸破青山浪  
修

鱗出水玉叅差晚日搖光金蕩漾長林無聲楓葉丹清  
波不動江水寒誰令此圖落塵土乃是楊侯造化之筆  
端我披此圖四十載老去而今重見畫空留名字落人  
間當日題詩幾人在漁人走利士走名得失與魚相重  
輕笑把綸竿渺滄海浩氣直欲膾長鯨

支遁相馬圖

支郎天機深世故一馬中向來蔬筍氣寓物一洗空眼  
前無騏驥遠目送歸鴻僧中有良樂萬里籟雲風

逢李按察

豫章蔽牛馬郢匠斧以斯太阿斷犀象補鞋不如錐君  
子識其大不為流俗移青雲自茲始功業當及時

全齊十萬戶繡衣付儒臣往時佩犢者今日扶犁人潛  
魚遊青波脫兔思荒榛賢哉渤海守盜賊皆吾民

漢儒事章句去道利乃倍桓譚謂子雲此事今獨乃岱  
嶽小天下齊魯復何在會當登日觀一目了滄海

好酒無深巷急足無善蹟一偽喪百誠中和為士則澤



中一方鏡解引萬里色往時王廣道山東化遺德

堂堂竹溪翁如天有五星篆籀深魏漢文章倣六經後  
生翫華藻骯骯婉白青善哉劉與李斯文見典刑

西方有佳人貽我白玉琯吹之和八風元氣生虛窅翩  
翩兩青鳥云是王母遣天長道路濶音信何由展

皎皎霜雪練寒女機中出織成天吳鳳被之臧獲質如  
何窮鄉士九月猶絺綌不見王逸賓抱窮守空室

君侯下車日百城風凜如公餘一炷香谿山奉宴居治

要無多言所貴一字虛所以曹相國不讀城旦書

本心如水鏡功名時翳之少年塵累盡萬象復在茲水  
冷知天寒絃高覺柱危世無齋心友誰知此襟期

二豪角談鋒氣湧胸中山達士兀無言雙手縮袖間理  
勝是非遣道在禽魚間回也真不愚高風藐難攀

### 春水行

光春宮外春水生駕鵝飛下寒猶輕綠衣探使一鞭信  
春風寫入鳴鞘聲龍旂曉日迎天仗小隊長圍圓月樣

忽聞疊鼓一聲飛，輕紋觸破桃花浪。  
內家最愛海東青，錦韉掣臂翻青冥。  
晴空一擊雪花墮，連延十里風毛腥。  
初得頭鵝誇得雋，一騎星馳薦陵寢。  
歡聲沸入萬年觴，瓊毛散上千官鬢。  
不才無力答陽春，羞作長楊侍從臣。  
閒與老農歌帝力，歡呼一曲太平人。

涿郡先主廟

炎燼終四百，海飛羣雄奔。  
蛟龍離舊隱，豺虎瞰中原。  
仗義公天下，豈料中山孫。  
艱難拒赤壁，顛沛乞荊門。  
劉郎

非嬌客肯市一女恩譬如韝上鷹既飽則飛翻山陽公  
安在灑淚西南坤區區一隅地鼎立事雄尊滅魏壯圖  
屈窺吳遺恨存嗚呼永安宮慷慨臨終言老瞞安足雄  
死面醜奸魂仁與不仁耳成敗何必論天乎未厭漢河  
洛不足吞盜子復為盜丕乎猶子元等為一國亡善惡  
終不諼

當時五丈桑塲頭搖羽葆草木尚有情人心不如草緬  
懷車蓋翁三顧隆中老乾坤一草廬鼎足事已了艱危

奉命際流涕出師表一時會風雲千古事蘋藻野農復  
何知尚說官家好筵卜傳神語瓦釜薦行潦瀘水耕餘  
村范陽行處道天留西日遲地狹東風早風霜慘燕鴈  
歲月愁蜀鳥亦復梁父吟塵埃驚潦倒

扈從行

馬翻翻車轆轤塵土難分真面目年年扈從春水行裁  
染春衫波漾綠綠韉珠勒大羽箭少年將軍面如玉車  
中小婦聽鳴鞭遙認飛塵郎馬足朝隨鼓聲起暮逐旗

尾宿樂事從今相繼躅聖皇歲歲萬幾暇春水圍鵝秋射鹿

從帥府謁太清宮

層宮枕蒼陂地迴風日冷旌旗隱復見原陸互馳騁悠  
悠塵外趣宵宵壺中境山川蒸淑氣草木閔清景周疆  
有楚宋漢肆列鐘鼎尚矣千歲檜荒哉九龍井懷竒目  
以擊契冥心獨省悲歡萬古促賞晤一日永清波獲魚  
尾落日頽牛領天寒鷹隼擊水落鴻鴈影白日照征夫

青天入漁艇洗兵江漢清茲焉事幽屏

遊醉翁亭

一逕入幽谷磴迂景更延陽光時翳竹石色寫冷泉不見琅琊寺心知白雲邊殘僧戀幽景斷臂初非禪歲暮少風雪回祿無寸椽海內有此亭奪去寧非天中有不壞者斷碑猶宛然逋民半吳越過客多幽燕樹根落斷崖脚掛從軍鞭鳥啼空落日野色愁寒烟月上人歸盡山空水濺濺

陽水篆

護書如護兒救燎如救飢可笑亦可憐似高還似癡為  
此陽水篆法傳丞相斯長揪蹙騏驎快劍斬蛟螭珣  
祖廟器衮冕巖廊姿夜光含圭角春水變華滋觀物獨  
寫妙苦心人得知入石疑無筆妙處君獨窺廬陵千載  
人愛此尤崛奇一旦隨灰燼世疑山澤肥成壞固有數  
惜哉徒爾為永成吾不預既壞那可追當其將壞間萬  
一神護持一物尚不忍其餘可類推乃知放麋翁仁心



不吾欺

送墨李道士元老


嵩山到嵩陽相望二百里數驛走商嶺兩崖夾伊水飛  
烟空翠間前路轉多山雲橫碧嶂斷雁沒青天還鳥鳴  
青山上人行修竹裏犬吠得柴荆花落鳥驚起草荒摩  
詰墅火斷魯山碑昔疑王家畫今信謝公詩其中一道  
士生計蒼烟碧松下讀道經窗間寫周易相看斗南北  
不見十年餘重尋化鶴夢要寫換鵝書雲間侍玉皇日

下瞻天表歸去秋海邊乾坤一壺小君歸我正病病起  
霜滿鬚尚能持酒否還憶寄書無遙知鳴皋下尚有蒼  
苔迹讀我往年詩因之拂塵壁

送李天英下第

天雞拂滄溟萬里起古色南風搖冷雨歸興生羽翼二  
年客京華一第為親屈文字天地仇風雲囚霹靂鸞凰  
望霄漢騏驥絆荆棘蹭蹬升天行白雲繫胸臆遙憐弟  
妹長摩頂今過膝人生在家樂絕勝長為客老夫懷抱

惡數日臥向壁胸中畧雲夢眼底無敵國雲歸北海後  
鳥沒青山夕目斷東北塵茫茫如有失



御訂全金詩增補中州集卷十

欽定四庫全書

集部

御訂全金詩增補中州集卷十一至三

詳校官中書<sub>臣</sub>張虎拜

主事銜<sub>臣</sub>徐以坤覆勘

總校官編修<sub>臣</sub>王燕緒

校對官編修<sub>臣</sub>勵守謙

謄錄監生<sub>臣</sub>黃嘉績

欽定四庫全書

御訂全金詩增補中州集卷十一

趙秉文三

與龐才卿雨中同遊太寧山

羣山西來高崔嵬太寧萬疊屏風開半天截斷參井分

夕陽不到吟詩臺

寺有吟詩臺馮瀛王寓筆研於此

近都形勝甲天下

況此萬斛藏瓊瑰青蛟百道走玉骨下赴僧界如奔雷

泉聲夜作雨飛來冷雲滴破烟嵐堆柏梯可望不可到

石鱗冷骨粘莓苔塔上一鈴時獨語慎勿促裝遽如許  
徑須携被上方眠明日顛崖看懸乳寺後一峯高更寒  
歸來駐馬更重看蕭蕭易水寒流廣蒼茫不見雲中山  
西風栗葉高陽道淡淡長空沒孤鳥荆卿廟前濕暮螢  
昭王臺畔霑秋草擬豁千秋萬古愁更須一上郡城樓  
西山應在欄干外拄笏閒看浩蕩秋

和淵明擬古

亭亭澗底松婉婉窗前柳穠華能幾時不耐風霜久感

君傾意氣遂託金石友  
膝上橫秋霜中筵列杯酒  
酒明相知深劍明終不負  
時運有代謝交情隨薄厚  
寄言歲寒姿枯榮復何有

停杯且勿飲劍歌已三終  
男兒重意氣結髮早從戎  
生當為世豪死當為鬼雄  
驚沙射人面日莫來悲風  
空卷冒強敵力向陰山窮  
仍聞霍嫖姚萬騎出雲中

客從遠方來氣貌充以完  
鞍馬光照地怪我儒衣冠  
問君何苦心所慕惟孔顏  
古豈無賢豪十六子八關  
獨携

無鹽子流盼青雲間  
芝蘭吐幽芳山水發清彈  
願為九臯禽接翼萬里鸞  
揮手欲謝客所懼非飢寒

清清一本蘭俟時吾將採  
不採庸何傷香色終不改  
太陽顏西汜明月生東海  
日月如飛梭榮華不相待  
寄言紉佩子無貽後時悔

重午遊冠山寺

南風搖百草吹我遊山樊  
青山映華髮似我頭上冠  
長松五月窓戶閑終古不散蒼雲寒  
步出喬木杪俯視林



下鞍飛亭枕爽塏更覺天宇寬憑高送遠開心顏白雲  
青嶂非人間深林冥冥白日暮飛鳥裔裔長空閒夕陽  
萬里開野色晉趙形勢空河山時清老守容癡頑臨風  
把酒遺巾綸明朝却望題詩處城樓惟見烟中竿

七夕與諸生遊鵲山

七月七日人間秋興來飄然鵲山遊靈仙役鵲渡河去  
白雲嶺上空悠悠手持雲腴酒與雲更獻酬雲既不解  
飲且可與子消百憂

闕

無聲非

無聞聲向根極生隱几以眼聽嗒然遺其形少焉性空  
水靈臺湛虛明從渠童子見擲瓦戲清冷

南麓畫華清宮圖

天寶遺事今幾年華清樓殿非人間五家羅綺隘山谷  
驅入尺紙天工閒碁分繡嶺線涇渭人物微茫纔位置  
想當睥睨下筆時兩眼猶能書細字乃知棘端可以造  
沐猴巧奪造化非人謀胸中度世乃吾事坐令千里當  
雙眸明皇初心小堯禹肯比金陵一孱主一盼聊為妖

姬留奈何坐此覆神州  
太白西去有鳥道  
蜀山秦樹令人老  
浮雲一蔽漁陽城  
祿山馬飽宮前草  
恩流四海一玉環  
敵人不合窺潼關  
至今脂澤下蟾口  
時有飲鹿疑神奸  
豈知水洗凝脂滑  
一掬傷心馬嵬血  
多年鬼火化為碧  
還遶離宮送行客  
龍巖幾度過華清  
筆端山高水冷冷  
嗚呼興廢今已矣  
祇有丹青留典刑

鷓鴣

皋落秋風暮深崖  
得爾鷓鴣他時萬里翼  
天末片雲孤何

處三窟兔古城千歲狐佇翻壯士臂飛血灑平蕪

遊晉祠

官閒屏騎從意行無澗岡青山盡處山口轉清溪宛與  
青山長古城尚隔叔虞廟水氣先入軍衣涼溪行不十  
里喬木森千章靈泉萬古流不竭蕩雲沃日搖精光素  
月落圓甃青天入方塘樵歌中流簫鼓發擊汰驚起雙  
鴛鴦脚踏船舷腋兩生明月照我歌巾裳兩生為我歌  
與子酌一觴興來灑墨三四行使汝名似前輩香歌罷

忽惆悵欲歸且徜徉清風明月本自無盡藏青山綠水  
何處非吾鄉世間風波老可畏物外日月初不忙安得  
此溪化作百斛酒狂吟大醉三萬六千場一朝忽騎赤  
鱗去歸來晉溪流水依舊空茫茫

遂初園

人生衣食爾所適飽與溫逮其得志間歸心負初言少  
壯慕富貴老大憂子孫此心本無累利欲令志昏嗟我  
復何為未能返丘園物外恐難必開圖對一樽

歸愚莊

平生功名心世路多崎嶇年來忝聞道何者非夷塗莊  
後桑百本莊前芋數區草屋三四間榆柳八九株僮僕  
足使令雞犬應招呼商鉅向我言官豈不足歟如何天  
壤間不容七尺軀忘身百事懶忘心一物無忘已又忘  
物兀然同太虛不皦亦不昧無毀亦無譽不向醉鄉醉  
即歸愚谷愚

閒閒堂

天運如轉轂日月如循環人生天地內頃刻安得閒所  
貴心無事心安身自安低頭拾紅葉仰面看青山朝聽  
新泉響暮送飛鳥還清晨了人事過午掩柴關高非出  
天外低不墮塵寰花落鳥聲寂我處動靜間

翠貢亭

修竹百十箇老柏四五行日出烟霧散露葉翻晴光時  
携一壺酒來此據胡牀鳥啼白日靜花落春風香君看  
蒼翠間法身露堂堂即物元非真離物又非忘掩卷忽

而笑風枝奏笙簧

佇香亭

今辰復何辰幽花滿中國愛此風露香  
佇屐齒痕花殘蜂蝶逝花開蜂蝶喧  
物理有代謝花枝獨無言無言還有情  
似訴誰空樽今我不為樂知有來歲存  
呼兒具癭杓喚妾傾瓦盆且盡一日歡  
萬事不復論

琴筑軒

琴筑雖有韻不鼓則不鳴流水無徽絃  
使我神慮清風



月為節奏是中無虧成聊將不俗

以下闕

跋武元直漁樵閒話圖

兩翁久忘世木石以為徒偶然相值遇風月應指呼廢  
興非吾事胡為凡區區但覺腹中事似落紙上圖一以  
我為漁神遊渺江湖一以我為樵夢為山澤臞形骸隨  
所寓何者為真吾尚忘彼與此況復朝市娛西風下落  
日渡口吹烟孤無問亦無答長笑歸來乎

就劉雲卿第與同院諸公喜雨分韻得發字

君家南山有衣鉢叢桂分香老蟾窟從來青紫半門生  
今日子孫牀滿笏爾來先生復秀出論事觀書眼如月  
豈惟傳家秉賜彪亦復生兒勗勗往時嘗乘御史驄  
未害霜蹄聊一蹶雙鳬古邑試牛刀百里治聲傳馬卒  
今年視草直金鑾雲章妙手著揮發老夫當放一頭地  
自慚老驥迫霜鶻座中三館盡豪英健筆縱橫建安骨  
已知佳會得四并更許深盃辭百罰我雖不飲願助勇  
政要風燈照華髮但令風雨破天桴未怕歸途洗靴襪

九日登繁臺寺

九日獨何日寒花發幽芬波澄無餘滓天清廓游氛鵬  
盤翼迅風鴻響厲層雲我與二三友意適同酣醺南登  
歌吹臺一弔信陵君捐軀赴趙壁談笑却秦軍夷門今  
安在草沒侯嬴墳我亦感激士白首羞論文禁中有頗  
牧慷慨志奇勲登臨送將歸無為愴離羣蒼茫視八極  
烟靄何紛紛懷古托長劍悵然日西曛

伯勝九日詩蕭然有陶風趣次韻

九日獨何日高懷無與娛仰視天宇清倏見飛鴻孤哀  
嗚呼其羣相望邈江湖豈不念親友林間置樽壺不醉  
慎毋歸且莫歌驪駒今日不為樂奈此歲將徂風霜艷  
黃菊興與南山俱此時如不採但恐隨樵蘇日莫登吹  
臺蒼茫望八區翻然念鄉國北望一長吁

倣玉川子沙麓雲鴈硯屏為呂唐卿賦

吾聞春秋紀年二百四十二不書祥瑞書災異不知何  
年沙麓崩六鷁退飛失其四恒星不見夜有光星隕如

雨石在地孔子諱魯不諱宋但記日有食之既豈知淪  
影入石中蟾蜍桂影俱蒙籠初疑日中有兩鳥雙飛跳  
入姮娥宮鷄火賁賁尾伏辰狀如赤鳥雲非雲女媧煉  
就五色石搏沙斫作愚下人史蘇發占又端策坎為白  
月艮山右兌升而雲離奮翼重兌為呂歸有德呂侯寶  
石到子孫更遣趙子窮其源齊趙馬牛不相及如何窮  
此造化根世間萬事何不有耳目之外難具論海中時  
時發火焰世界一一持風輪一微塵內細須彌有頂天

上猶崑崙併却咽喉與唇吻別有一句超乾坤木人撫

掌非耳聽石女懷胎

闕

扇子築著帝釋鼻鯉魚驚

翻東海盆吾言非夸子夸矣要與摩詰無言

闕

### 倣樂天新宅

吉凶翻復兩何如新貴移來舊貴居昨日弓刀圍舊宅  
今朝車馬慶新除兔驚尚顧罝中兔魚逸還尋罩下魚  
富貴貧窮皆有命大都覆轍戒前車

### 倣郎士元寶刀塞上兒

長安美少年白馬黃金鞭後騎捧長劍官儀如殿前烟  
塵生絕塞烽火照甘泉如聞辭第將遺貌上凌烟

從軍行送田琢器之

嚴風吹霜百草枯塞外馬肥思南驅長戈飛鳥不敢度  
扼吳嶺下行人無鈎鈐一夕妖星過賊臣自掣居庸鑠  
藏金鄆塢未厭深長安三日燃臍火北兵數道下山東  
旌旗絳天海水紅北人歸來血飲馬中原無樹搖春風  
索馳羶車載金帛城上官軍宜嘆息累累婦女過關頭

回望都門心斷絕漢家公主嫁烏孫聖主重戰議和親  
北望

地名

一舍如天遠黃沙茫茫愁殺人田侯落落奇男

子主辱臣生不如死殿前畫地作山川請以義軍相表  
裏恨我不得學李英愛君不減侯莘卿子明又請當一  
面禁中頗牧皆書生橫遮俘虜三十萬潼關大笑哥舒  
翰上書慷慨請長纓臨風鍛翮空三嘆

題楊祝監風雪曉裝圖

林空月已沈雪落風未掃束裝事晨征之子涉遠道心



知馬上人萬象入腹藁髯奴亦可人行李伴幽討塵中  
無此客風雲滿懷抱逢辰則伊呂不然商山皓如何苦  
憔悴薇蕨不得飽前身孟浩然後身窮賈島三生紙上  
形千古笑枯槁向來富貴骨露濕原上草百年等一夢  
翻覆無醜好那知風雪癯不是蓬山老所以邢和璞一  
笑幾絕倒

試院中愁坐叔獻學博忽送紅梅小桃數枝坐念  
春物駘蕩西園開鑰不得一觀作詩破悶兼簡張

文學仲山

數日天氣殊未佳  
文書如山眼生花  
忽遣官梅入吾室  
政爾東君解留客  
蠟梅無韻空有香  
紅梅亦復清而莊  
此花韻勝開較晚  
天許風流嫁海棠  
海棠春驕睡未足  
環兒酒暈紅潮玉  
不應更有林下風  
翠袖天寒倚修竹  
銀瓶亦有小桃枝  
茜裙游女窺荆籬  
青枝綠葉不須問  
自有月影溪光知  
冰花不肯相媚嫵  
來伴詩人作詩苦  
橫斜影落水中融  
入詩中作奇語  
古來詩人例多窮

把酒對花酒已空亦知寒食只數日醉夢不到西園中  
天上公子被花惱一笑回波嘲桄桄不須區區索酒錢  
但可煎茶對花前

慧林賦海棠

君不見三郎花下吹觥栗寧王搦管幡綽拍一聲驚破  
夢華清海棠頓覺無顏色又不見百花潭北西郊路醉  
裏花仙覓奇句覺來酒盡花已空詩人不是無心賦梨  
園富貴春蕭瑟空對畫圖三嘆息杜陵誰有補亡詩坡

仙詩中畫更奇君不見西園往日稱繁雄羅衣不復能  
春風雄樓傑閣春色裏溫馨淑氣月明中纖條嫋嫋春  
無力猶遶空牆絆遊客不應折贈寄僧房來與幽人慰  
岑寂石門老衲僧中癯鼻端苦覓香有無何似東菴人  
散後月斜疎影照跣趺

冷巖行

堯山堂外紀司馬永貞金宗室時  
稱賢宰相自號冷巖周昂亦有詩

禪房閣雨鎖春陰幽人切切鳴幽琴一聲兩聲風蕭森  
三弄五弄天沈沈紛紛十指終不亂雙鸞對舞揚哀音

初為湘靈怨再鼓別鶴吟絃聲按抑止復作忽然變態  
窮崎歎曲終從容奏恬淡落花啼鳥青春深苗夫子吾  
獨知爾心胡為翻作冷山操此意似欲為師箴昔年憶  
侍明光宮曾以絲桐沃舜聰薰風一曲巖廊靜萬國無  
為至化中明昌有道真重瞳重瞳左右多夔龍朝廷詔  
起冷巖公鼎湖龍去弓劍空不聞天寶相國忠漁陽馬  
嘶旌旗紅聖主中興日月功首誅羿浞鉏羣克張公上  
書見大計臣以琴諫非琴工先生年來到骨窮但願四

海無兵戎夜闌更請彈三樂臣獨飢寒亦不惡

和淵明歸田園居送潘清客六首

身行半天下何處無名山蘇門天下勝築室不待年曩  
時孫公和今代潘子淵無家安四壁治生惟守田去國  
行萬里往寄茅三間山川半豺虎一水不得前寄謝李  
龍眠為我寫風烟曲肱畫圖裏臥遊西山巔尚恨畫中  
隱不得招閒閒有願何必遂古人豈盡然

人生本無累世路自羈鞅悠悠塵中境翳翳霞外想蘇

門有佳處悵望不得往遙知西山下烟雨薇蕨長有願  
神莫違誰謂河水廣夢逐西飛鳥一夕馳渺莽

萬國角聲裏日暮行旅稀幽人如野鶴思逐南雲飛冥  
冥花經眼冽冽風吹衣平生香火願毋使寸心違

堂堂鵠林師法喜以為娛談道有原委百川會歸壑城  
市俛莫留野性山林居年荒拾橡栗濕柴燒楸株尚憐  
陶與陸問訊今何如當時蓮社人寥落今幾餘修靜復  
西去而獨逃空虛藍輿會相訪容我醉時無

昨日遊東城今日復南陌偶逢素心人把手便歡適一  
談復一笑不覺日西夕騎馬穿市橋矯首望林隙歸來  
掩關臥尚恨為物役四論喜僧肇玄文幾陸績會當投  
絕學繕性終何益

駕牛函谷關跨鹿渦水曲相期無翼飛豈不賢尊足他  
年東坡翁一衲歸玉局相哀老不死分我一明燭千年  
暗室中一旦得朝旭

題巨然泉巖老柏圖



雪巖森危有老柏幾度寒泉漱秋月氣凌層空白日寒  
根貫斷崖蒼石裂奔騰逝水送流光剝落古苔封老節  
明堂未作棟梁材潦倒風霜半無葉何人胸次富泉石  
巨然袖中董源筆崖傾岸絕無人見夜半移舟真有力  
賢侯筆力分曹植氣象參天二千尺為回筆力挽萬牛  
頓覺烟嵐少顏色

夢登華山

夢登蓮華峰舉手摩青天道人寬我心相與掬飛泉風

吹青霞佩飄若雲中仙下視塵世人擾擾名利牽直欲  
叫蒼穹生靈日熬煎安得側仙掌狂瀾迴百川一洗六  
界塵萬騎還全燕功成不受賞棄之若浮烟金膏換華  
髮玉液煉丹田金丹如可冀脫屣區中緣閒尋碧玉調  
朗詠青苔篇還騎雙白鶴飛下青山巔

尚書右丞侯公雲溪圖

朝遊雲溪上暮遊雲溪下不知雲溪雲去作人間雨流  
水赴大壑白雲思故山何時溪上人心與歸雲閒黃公

山下雲溪路十里溪光照雲樹溪流瀟瀟讀書聲想見  
先生舊遊處溪上老僧今白頭天書招我歸來休圮上  
方傳黃石畧山中未暇赤松遊我公昔年提孤軍旌旗  
絳幄張魚鱗鯨鯢沸天海水渾罵賊嚼齒欲見齟齬倪  
十萬寄一身咸陽白骨迴青春九重嘆息天為顰殿前  
論事氣益振滄海未全歸禹貢山東且願變齊民匣內  
寶書金屈戌腰間瑞節玉麒麟衛國錦衣歸故里代公  
黑髮更慈親他年鐘鼎出元勳二十四考中書君整頓

乾坤濟時了飄然却返雲溪雲

過廣武山

塵靈晦金鏡鹿走羣雄馳龍騰海水沸虎怒風林披成  
舉天下險楚漢昔相持乃翁一杯羹且欲共分之兩雄  
不並立鴻溝徒爾為裒瘡撫戰士智勇亦已疲滎陽非  
吾厄帝圖乃天姿陰陵夜失道慷慨兒女悲長陵一杯  
土笑然牧羊兒勝負兩蝸角興亡一枰棋而况彼區區  
二蟻爭雄雌西登廣武山曠望九河湄野曠知天迴崖

傾覺岸危青山明劍戟霜林列旌旗雲槎秋浩渺烟樹  
晴參差淒涼阮生嘆曠浩謫仙詞懷古念離散興極淚  
還垂

河中八詠

舜井

一水獨冷然浮雲幾變遷  
心知思舜處時見井中天

夷齊墓

讓伐理難全求仁豈怨天  
乾坤吾道獨宇宙此山傳不

肯食周粟猶應飲舜泉冥鴻飢欲死落日唳昏烟

鸛鵲樓

樓成鸛鵲幾時還人去樓臺竟日間地接連城秋水渡  
河分兩岸夕陽山墟烟冉冉分秦樹隴鴈依依度晉關  
千古廢興還造物暫攜風月出塵寰

逍遙樓

黃河城上逍遙樓何人能作逍遙遊斷霞落日今猶古  
明月清風春復秋千里兵塵常漠漠五年心事漫悠悠

中條大華不忍見雲自高飛水自流

汾陽王像

天寶突騎興漁陽首提孤軍起朔方  
掃除欃櫓廓氛翳再使日月光吾唐  
丹青凌烟誰第一功業汾陽異姓王  
當時太尉亦雄偉天不憖遺壯士傷  
河中重鎮甲天下渾公與公屹相望  
時危英雄常恨少撫壁再拜涕泗滂  
諸酋下馬識公否公雖云亡像在堂

吳生畫

吳生大士十六像歲久塵昏蛛網絲真物從來有真賞  
息軒為作証明師

楊惠之維摩像

一點傳心已失機更求形似轉成癡至今遺像兀不語  
猶似當初問法時

先公碑

過客紛紛總不知先公事迹竹溪碑旁人未省摩挲意  
也覓西廂待月詩



汾陰祠后土

間間吏隱官蓬萊玉堂給札非仙才封香汾陰祠后土  
騎士引赴軒轅臺龍門峽東天下險狀如萬頃納一杯  
方丘中峙巨鼇趾黃河一箭從天來長風吹雲碧海去  
曠蕩萬里晴天開青山終古不改色下送落日浮金罍  
滄波幾回照新鴈往日繁雄安在哉君不見漢家六葉  
誇雄才力通象郡臣龍堆泰山日觀封禪罷屬車九九  
聲如雷橫汾中流簫鼓發酒酣樂極情生哀秋風一曲

在人間茂陵挂樹空莓苔又不見開元四海不動塵千  
麾萬騎祠神睢侍臣文章咸第一豐碑自勒鏡崔嵬憑  
高慨詠才子句山川滿目空塵埃鈴聲琳琅蜀道雨想  
見萬里愁雲迴蒲關北走滎河道巖深地古今人老北  
師夜渡黃河水生人憔悴如霜草吾皇神聖如軒轅北  
伐萬里清中原徧秩羣神禮喬嶽還因告土祀坤元靈  
祇紛紛福來下倒卷天河洗兵馬重新日月照乾坤再  
整山河歸廟社三河形勢滿河中獨紀葵丘第一功唐

漢遺民尋故事還思法駕幸河東

會靈觀即事

戊寅五月十六日試宏詞二首

靈宮初雨餘散策步幽徑深樾不見人微風度疎磬心  
閒偶無事虛極自生聽時復靜中喧歸禽暮爭暝

歌枕北窓風書葉久未定午夢破華胥起看松陰正閒  
居觀物化靜處見天性鳴鳩亦何為谷谷自相應

題東坡石鐘山記墨蹟

書為水漬幾半

東坡謫齊安人怒神所許倒騎臥水龍醉踞石頭虎赤

壁萬里江一葉吾敢侮歸來抵湖口此樂乃并與扁舟  
絕壁下鸛鶴如人語風雷相轟颺水石互吞吐山遺洞  
庭樂帝下鈞天舞石鐘不吾欺一證萬萬古遺墨落人  
間訛缺十四五模糊魯壁簡剝落岐陽鼓蜿蜒半鱗甲  
尚恐脫風雨畫移瓦棺壁劍化延平渚祝君什襲藏隄  
防六丁取

武元直畫喬君章蓮峰小隱圖

武君非畫師勝概飽胸臆太華五千仞驅寫入盈尺飛

泉峰頂來落我松下石清風忽吹散琴上濺餘滴呼兒  
急寫之指下淋浪濕未知責子翁頗復有此適何如圖  
中人真作林下客青山不違人但恐富貴逼勇退良獨  
難此願誰能必向來燕趙間逆旅拜真逸兒時弄琴者  
天涯老相識俛仰四十年父子埋雙壁卷中題詩人十  
九已仙籍年光飛鳥過紙上但陳迹對此還自傷何事  
為物役還丹日月遲白首陽光疾文章真小技身外皆  
長物拂衣歸去來蓮峰入心碧

中元夜祭太一罷對月

今夕知何夕白露涵秋空  
褰衣踏明月如在瓊瑤宮  
細數秋兔毫桂樹何璿璫  
當年誰所種翳此天公瞳  
清光知人意飛影入杯中  
流霞酌不盡清光浩無窮  
我欲溯白雲一訪東坡公  
扁舟下赤壁此樂將無同  
疇昔縞衣仙化作羽衣僮  
酒酣邀我去鶴背冷松風

靈官夜醺餘香霧飛不起  
更衣步石壇風露浩如洗  
月波走金蛇入我清樽裏  
引杯不復疑弓影正如此  
夜深

聞雁過歟見

闕

几松間龍一吟風庭應落子空中步

虛聲隱隱猶未已

東軒老人河山形勝圖

太虛匠流峙造化誰胚胎洪荒萬萬古至今餘劫灰黃  
河發崑崙匣怒不敢乖初經龍門天下險勢如萬頃納  
一杯桃花浪激不得上凡魚幾曝鱗與腮下趨神睢如  
地底終古不到軒轅臺蒲津沈沈臥虹影鐵牛駕浪輸  
黃能千里一曲復一曲傾山倒嶽不復迴巨靈運東肘

華嶽為崩推茅津濟師想勝槩搔首北望令心哀萬派  
赴集津鼓聲如會垓神斧忽中斷鑿鑿何年開崖傾路  
斷飛鳥絕輕舟一箭浮天來篙師絕叫未及瞬回望已  
失雲濤堆但見兩崖蒼蒼半天外三門斗落如驚雷擘  
窠大字誰所銘高山百丈磨蒼崖廟前劉公一片石龜  
龍剝落生莓苔東軒先生生長三晉地回視韓魏空浮  
埃想像舊遊處落筆如山頽胸中元自有山河寫出勝  
槩何壯哉餘波到諸郎直氣凌斗魁況復文章妙天下



睥睨晁張顰蘇梅竹帛如山不經國安用江鮑稱詩才  
劉夫子我有一杯酒澆汝胸崔嵬嗚呼聖道久榛塞孟  
氏闢路誅蒿萊諸儒辛苦補罅漏未見巨手如排淮後  
生索塗方擗埴雖有耳目如嬰孩祝君頽波作砥柱驅  
入聖海無津涯劉夫子深藏什襲作龜鑑先生此圖吁  
可懷

春雪

幽窓不知春但覺寒轉加開門散飛雪帶雨不成花盤

空飛瓊舞作態正橫斜著樹暫璫瓏少焉委泥沙急埽  
枝上玉為我試新茶不須待明月湯好客便佳

題趙琳畫東坡石上以杖橫膝肩頭二首

廟堂竟何人此老乃石上盤礴萬古胸入此一藤杖擊  
去荆舒蠻扶來司馬相君看熊虎顏百獸不敢傍

東坡謫嶺南一笑六根靜食骨不棄餘又使羣狗競手  
中果何物乃是照邪鏡爾曹何足容以杖叩其脛

擬陶和許至忠二首

西日頽殘照北風凜寒威侏儒飽欲死幽人獨無衣不  
上北闕書甘采西山薇曾子已再化甯遽早知非豈不  
樂仕宦恐與心事違柴桑舊三徑吾行其庶幾尚憐淵  
明翁頗負責子譏隱居茅簷下聊欲曝斜暉

歸田有何樂佳處正在茲閒與老農語夜雨深一犁行  
年近六十悠悠復何之有田足我食有布成我衣富於  
黔婁生樂於榮啓期妻子愠見言一點不上眉吾師有  
遺訓貧賤不能移

題牧牛扇頭

一牛顧其犢一牛軒尻睢旁有牧犢子窺巢攀樹枝嗟  
爾有餉具不念鴉鵲飢烏鴉各天性飛來護其兒汝親  
亦念汝而人獨不知不如兩相忘人禽相娛嬉

東籬采菊圖

淵明初亦仕迹留心已遠雅志懷林淵高情邈雲漢妖  
狐同晝昏獨鶴驚夜半平生忠義心回作松菊伴東籬  
把一枝意豈在酒醅不見白衣來目送南山鴈淡然忘

言說聊付一笑粲

贈眼醫

和扁不並世世豈無良醫今代王彥若恨無東坡詩大  
弔臥壯士積熱下腦脂神針運斤風此妙人得知君言  
吾有道神視了不疑擘山導河流破壁取蛟螭聖道如  
日月浮雲時翳之誰為補天手刮膜施金篦韓孟不可  
作此藝真吾師

釣蓬

船蓬無可載意釣不在魚此身真襤褸萬事一蘧蔭無  
載不能沈死魚安足餌洛水是非波臨軒聊洗耳

聽雨軒

無田妻啼飢有田稻蟠泥等為飢所驅貧富亦兩齊雨  
中窓下眠窓外芭蕉語置書且安眠催租吏如雨

擬東坡謫居三適

旦起嚙日

老人畏朝寒常恨為物役爬搔未云已簡書催我出爾

來先朝叅晨起喜見日王事有期程安能待其畢披衣  
向東方聊復效龜吸漸漸支體柔谷谷真氣入少焉肝  
腸煖陽和通百脉吾年六袞餘前路那可必未來不吾  
預已逝安容息及此未病間聊冀一溉益

午窓曝背

清晨了公事及午身得閒南榮有晴日曝背於其間稍  
稍陽光舒融融和氣還時携一冊書眼花紛爛斑倦即  
枕書臥散盡腰脚頑清於三杯餘甜勝一枕跼人間有

此適不憂天公慳世人慕煖熱肉屏醉雲鬟雖得一餉  
樂憂喜常相關癡兒亦笑我市中有樵山

夜臥炕煖

京師苦寒歲桂玉不易求斗粟換束薪掉臂不肯酬日  
糴五升米未有旦夕憂近山富墨堅百金不難謀地炕  
規璫瓏火穴通深幽長舒兩脚睡暖律初回鄒門前三  
尺雪鼻息方齁齁田家燒櫓拙濕烟怯淚流渾家身上  
衣炙背曉未休誰能獻此術助汝當衾裯



倣梅聖俞月出斷崖口二首

未伏暑尚在雨點落未落夢覺起視夜缺月掛屋角  
殘星橫斜河晨雞號天風幽人窓中眠紗厨明秋空

長白山行

長白山雄天北極白衣仙人常出沒玉龍垂爪落蒼崖  
四江飛下天紳白匹馬渡江龍飛天雲起侯王化千百  
至今甲第多屬籍時清毬馬爭馳突錦韉貂帽獵春風  
五陵豪氣何飄忽前年北騎瞰中原準擬長城如削鐵

君家兄弟真連壁胸中十萬森戈戟向曾論事天子前  
漢庭諸人動顏色心知不易一因命顧肯貪功事無益  
西南方面應時須帝曰來前無汝易從來十益不補損  
三輔蕭條半荆棘瘦妻曳耙女扶犁惟恐官軍缺糧給  
嗚呼瘡痍尚未復且願休兵養民力老夫謬忝春官伯  
白首書生不經國佇公功成歸廟堂再獻中興二三策

大金國志長白山白衣觀音所居其山禽獸皆  
白黑水發源於此舊名粟末河後改名混同江

渡水僧二首

日落前溪渡鐘聲隔岸聞秋水深可涉挽衣踏行雲行  
雲忽破碎波動生魚鱗化為百千我何者為我身此身  
尚非我況復影中人畫師畫具眼了此起滅因三生祠  
下夢一笑語前塵

一僧杭中流杖笠行相隨波紋生足指照影光瀾瀾一  
僧到彼岸前引如導師腰間兩不借身外一伽黎一僧  
方欲涉結帶如有思前山鳥飛夕後山雲起時君看眉  
頰間中有摩詰詩

時雨 有序

時雨美胥莘公也公以行臺移鎮平陽鄰畏其威民懷其德焉天降時雨山川出雲天相休運是生世臣維我世臣乃國于莘天子命之牧爾邦民北風喈喈雨雪霏霏嗟我晉人而瘡而痍吹之响之摩之撫之于燠其寒于飽其饑既瘳既夷不嘖以嘻孰為豹虎載柵載壘孰為螽賊載芟載理無擾我鄉我鄉我里無伐我桑我桑我梓遠人駢矣我民祉矣公在在堂如春斯溫激矢在

壺折衝于樽民安于廛兵安于屯公在在堂錦衣繡裳  
敝予改為斯民不忘公在在堂繡裳錦衣我民之思無  
以公歸

皇武有序

皇武命平章公移鎮陝右也皇奮厥武如雷如霆獷彼  
遠人載震載驚帝命相臣蘇此疲氓維時莘公展也大  
成公自平陽移鎮于秦世皆謂公在處陽春公在在秦  
有年無兵世皆謂公斯民德星惟此二方不寧不令帥

臣議征發言盈庭公奏累上如山不傾世皆謂公漢之  
營平既完三輔復保五城以迄于今夏人請盟維將盡  
能維公竭誠公拜稽首天子之明我公歸矣我民思矣  
詔公復起周邦咸喜願公百年以佐天子罔俾樊侯于  
周專美

鄭子產廟

晉楚更霸爭雄尊勢如兩虎挾一豚玉帛事楚方南轅  
晉師已及國北門鄭有人焉國無小晉楚雖大談笑了

臨風三嘆酌酒罇注目蒼陂望高鳥

過湖城

暮行潼關道百里蒼山昏峯斷忽平野大河東南奔我行屬冬季風雪浩以繁玄雲結層陰狐貉不得溫豈不念白首出使萬里藩惜彼守凍者據鞍復何言

過閔鄉

秦關百二天下壯百萬雄師未能傍函關未了又潼關潼關之敗何等閒九齡斥逐姚宋死邊將邀功從此始

今年西屠石堡城明年又起漁陽兵朝廷欲藉邊將重  
不覺猪龍心暗動祿山前死未可知雖有漁陽突騎將  
奚為自古明王重用武莫笑書生陳腐語

舍元殿

秦山從北來宮殿何巍巍舍元遺址在下建十大旂當  
肯休明日軒陛拱垂衣一旦人事改阿榮坐形墀譬如  
元氣衰百疾攻四肢陵臣更五代興亡如奕棋塵埋桀  
園骨火燒花萼碑寢殿通樵徑宮牆揮酒旗至今明月



夜石馬空聞嘶蒼天不可問渭水空自馳誰為後來者  
應與此心期

過乾陵

乾陵故梁山也舊有柏萬株亡矣有石藩王像來朝  
者六十四至今猶存下有章懷太子墓

曉日上乾陵乾陵何巍巍前瞻對雙闕上有十丈碑左  
右藩夷像想見朝貢時一抔土未乾衮服易禕衣好還  
雖天道剪伐盡本枝淒涼廬陵謫慷慨黃臺辭賴有狄

相國取日洗咸池  
母后盜國鼎  
呂氏非薄姬  
中睿乃其子  
天幸亦其宜  
驪山三日火  
見笑牧羊兒  
如何陵上栢  
獨有神護持  
千秋百歲後  
魂魄復來茲  
故山草木赭  
應悔復辟遲  
天回西日照  
歲暮北風吹  
南登樂遊原  
默誦  
昭陵詩

御訂金詩增補中州集卷十一